



Selasa, 19 September 2023
Ogen: Keluaran 24:3-7



“Ulih Ngoge”



Asum nuliskan bahan renungen wari enda, teringet penulis ku masa-masa sekolah i bangku dasar bage pe menengah. Maka reh nina guru man murid-muridna; *"semakin sering (diulang-ulangi) dibaca, maka akan semakin paham akan apa yang di baca' semakin sering latihan maka akan semakin mengerti akan soal yang dikerjaker"*. Ningetken maka lit kepe ulihna adi kita rusur ngoge bage pe ngerjaker sada-sada hal alu berulang-ulang. Ibarat bagi pisau entah sekin si nggo tumpul; adi sekali ngenca iasah alu batu asah tentu hasilna labo maksimal/memuaskan, tapi tupung iasah berkali-kali, pisau entah sekin si tumpul e reh tajamna reh dekahna, banci ipakai rikutken perluna. Sie enda ncidahken maka, tupung kita nggit ngulihni kerna kai si ateta iulihni (subuk dahin, usaha, bage pe bas sekolah) tentu kedungenna ulihna pasti berhasil entah pe sikap.

Bangsa Israel tupung bas perdalanan i tanah Mesir nari ku taneh si ipadankan Dibata pe megati iogeken Musa kerna Kitab Perpadanan si iperentahkan Tuhan man bangsa e, kai dalanna maka lalap iogeken Musa kerna kitab e; gelah bangsa Israel tetap nginget kerna keleng ate Dibata kempak kegeluhen bangsa e. Musa tetap ngogeken kitab e seh maka bangsa Israel nggit ngikutken kai si pedahkan Tuhan Dibata i bas kitab Perpadanan e. Usaha si ilakoken Musa kepeken rulih; bangsa Israel nggit ngikutken Tuhan; cara si idalanken Musa e erbahanca tertarik bangsa Israel lako ngikutken Tuhan.

Bas kegeluhenta selalu kita orangtua nandangi anak-anakta; selaku ndehara nandangi perbulangen; selaku teman i tengah persadanta perlu ka nge si usih bagi cara Musa si tetap ngogeken kerna Kitab perpadanan seh sinanami ulihna bas Dibata nari.